

ԱՐՁԱՆԱԳՐՈՒԹՅՈՒՆ 03

Հայաստանի Հանրապետության Արագածոտնի մարզում 2018թ. հոկտեմբերի

26-ին ժամը 11:00-ի կայացած մարզխորհրդի նիստի

Մասնակցում էին՝

Դ. Գևորգյան	ՀՀ Արագածոտնի մարզպետ
Ա. Սարգսյան	ՀՀ Արագածոտնի մարզպետի տեղակալ
Ա. Նիկողոսյան	ՀՀ Արագածոտնի մարզպետի տեղակալ
Գ. Աթանեսյան	ՀՀ Արագածոտնի մարզպետի տեղակալ
Հր. Գևորգյան	ՀՀ Արագածոտնի մարզպետարանի գլխավոր քարտուղար

Արագածոտնի մարզպետարանի աշխատակազմը, մարզի բժշկական հաստատություններին տնօրենները, Արագածոտնի մարզի համայնքների ղեկավարներ

Օ Ր Ա Կ Ա Ր Գ

1. ՀՀ Արագածոտնի մարզպետ Դավիթ Գևորգյանի խոսքն ուղղված մարզի խորհրդին:
2. Մարզի համայնքների սեփական եկամուտների հավաքագրման ցուցանիշների մասին /զեկ. մարզպետի տեղակալ Գ. ԱԹԱՆԵՍՅԱՆ/:
3. Մարզի համայնքներում աղբահանության կազմակերպման գործընթացի մասին /զեկ. մարզպետարանի աշխատակազմի քաղաքաշինության վարչության պետ Ա. ԴԱՎԱՅԱՆ/:
4. Մարզի համայնքներում ներդրումային ծրագրեր իրականացնելու և դրանց օժանդակելու մասին (զեկ. մարզպետարանի աշխատակազմի զարգացման ծրագրերի, զբոսաշրջության և վերլուծության բաժնի պետ Ի. ԲԱՐՍԵՂՅԱՆ):
5. Համայնքներին սուբվենցիաների տրամադրման և ծրագրերի իրականացման գործընթացի մասին (զեկ. մարզպետարանի աշխատակազմի զարգացման ծրագրերի, զբոսաշրջության և վերլուծության բաժնի պետ Ի. ԲԱՐՍԵՂՅԱՆ):
6. ՀՀ Իմ քայլը հանուն Արագածոտնի >> միջոցառման հետ կապված կազմակերպչական հարցերի մասին (զեկ. մարզպետարանի աշխատակազմի զարգացման ծրագրերի, զբոսաշրջության և վերլուծության բաժնի պետ Ի. ԲԱՐՍԵՂՅԱՆ):
7. Հայտարարություն – Մարզի համայնքներին սերմացուների և դիզվառելիքի տրման, ինչպես նաև համայնքներում անասնաբուժի հաստիքներ սահմանելու մասին (Յու. ԱԶԱՏՅԱՆ):

1. ՀՀ կառավարության 2018 թվականի հոկտեմբերի 16-ի N 1128 – Ա որոշմամբ ՀՀ Արագածոտնի մարզպետ նշանակված Դավիթ Գևորգյանը իր մասնակցությամբ անցկացվող առաջին մարզխորհրդի նիստի բացման խոսքում կարևորելով հանդիպումը համայնքների ղեկավարների հետ՝ ներկայացրեց այն խնդիրները, որոնք առկա են համայնքներում և առաջնահերթ լուծում են պահանջում: **Դրանցից առաջնայինը արդարության, օրինականության ու հավասարության լիակատար հաստատումն է և մարզում սոցիալ - տնտեսական վիճակի բարելավումը:** Կա հստակ պահանջների առաջադրում, դա է արդարության, օրինականության, ազնվության, հավասարության

հաստատումը մարզում, ուր խրախուսվելու է մարդկային և մասնագիտական բարձր որակների ապահովումը, օրենքի խախտման յուրաքանչյուր դեպքի նկատմամբ դրևորվելու է անհանդուրժողականություն: Մարզպետը իր խոսքում կարևորեց նաև առաջիկայում նախատեսվող Ազգային ժողովի ընտրությունների անցկացման գործընթացը, որը նոր իրավիճակում և նոր իրողությամբ պետք է իրականացվի: Համայնքի ղեկավարը իրավունք չունի իր լիազորությունները ի շահ կուսակցության ծառայեցնելու: Համայնքներում կուտակված են բազմաթիվ խնդիրներ և համայնքապետը պարտավոր է հստակ իմանա այդ խնդիրներն ու լուծում գտնելու ճանապարհները: Մարզպետարանը իր հերթին պատրաստ է լսել և աջակցել այդ խնդիրների լուծմանը: Պետք է աշխատել արտակարգ ռեժիմով: Չկան յուրայիններ և օտարներ: Տարբեր ոլորտներում ապօրինություններ և ամենաթողություն է եղել, և բացառիկ հնարավորություն է ստեղծվել մաքուր էջից սկսելու աշխատանքները, իսկ նախկին սխալներն էլ օբյեկտիվ գնահատել: Պետք է ամեն ինչ անել արդարացնելու ժողովրդի հույսերը:

**2. Մարզի համայնքների սեփական եկամուտների հավաքագրման ցուցանիշների մասին խոսեց մարզպետի տեղակալ Գ. Աթանեսյանը:** Նա ներկայացրեց վերջին 5 ամիսների ընթացքում իր ուսումնասիրությունների և կատարված աշխատանքների արդյունքները: Նշեց, որ մեծ մասամբ տեղական ինքնակառավարման մարմինները ողջ ծավալով չեն տիրապետում օրենքով իրենց պատվիրակված լիազորություններին: Սեփական եկամուտների հավաքագրման ցուցանիշները մարզում գոհացուցիչ չէ: Առանձնացվեց վատ և լավ ցուցանիշներ ունեցող համայնքները: Արագածավան, Սուսեր և Հացաշեն համայնքների ղեկավարները ներկայացրեցին այն պատճառները, որոնց հետևանքով համայնքներում գրանցվել են ամենացածր ցուցանիշները: Հաշվի առնելով այն հանգամանքը, որ հաջորդ տարվանից համայնքների դոտացիաների տրամադրման կարգում փոփոխություն է լինելու և այն ուղիղ համեմատական է լինելու սեփական եկամուտների հավաքագրման ցուցանիշների հետ, համայնքների ղեկավարներին **առաջարկվեց՝ մինչև հաջորդ շաբաթ ապահովել դրական շարժ այս ուղղությամբ:**

**3. Քաղաքաշինության վարչության պետ Ա. Դավայանը ներկայացրեց այս ընթացքում մարզում կազմակերպված 2 համապետական շաբաթօրյակի և անցկացված մարզային սանիտարական միամսյակի մասին:** Խոսվեց տարածաշրջանում աղբահանության խնդիրների և դրանց լուծմանն ուղղված աշխատանքների մասին: Նախկին 136 աղբավայրից մարզում այժմ գործում է 11-ը: Խոսվեց նաև աղբահանության կազմակերպման գործընթացի մասին: Մարզպետ Դավիթ Գևորգյանը ընդգծեց, որ այս մասով կառավարությունը հստակ ծրագիր ունի, համաձայն որի մշակվում են տեսլականներ աղբահանության և աղբի վերամշակման քաղաքականության վերաբերյալ: Այդ առումով շատ կարևոր է նաև աղբահանության վարձավճարների և պայմանագրերի գործընթացը ճիշտ և արդյունավետ կազմակերպելը: Կարևորվեց նաև աղբավայրերի հողերի նպատակային նշանակության փոփոխության և փաստաթղթային գործընթացի օրինականացման խնդիրները, որի կապակցությամբ հողաշինության և հողօգտագործման բաժնի պետ Ա. Հակոբյանի նախաձեռնությամբ **համայնքների ղեկավարներին առաջարկվեց՝**

**Մինչև նոյեմբերի 15-ը ՀՀ Արագածոտնի մարզպետարան ներկայացնել աղբավայրերի համար նախատեսված հողամասերի նպատակային նշանակության փոփոխության և հողհատկացման փաստաթղթերը:**

**4. Չարգացման ծրագրերի, զբոսաշրջության և վերլուծության բաժնի պետ Իշխան Բարսեղյանը գեկուցեց ներդրումային ծրագրերի իրականացման, սուբվենցիաների տրամադրման գործընթացի արդյունքների մասին:** Ծրագրային առաջարկները

հիմնականում վերաբերում են գյուղատնտեսական մթերքի վերամշակմանը, զբոսաշրջության զարգացմանը, անասնապահությանը, մեքենատրակտորային պահեստամասերի արտադրությանը, թեթև արդյունաբերության զարգացմանը: Սուվբենցիայի տրամադրման ծրագրին մարզի 72 համայնքից մասնակցել է 21-ը, որից 4-ը՝ խոշորացված համայնքներ են: ՀՀ տարածքային կառավարման և զարգացման նախարարություն է ներկայացվել 37 հայտ, որից հոկտեմբերի 24-ի դրությամբ հավանության է արժանացել 24-ը: Մարզում համայնքների կողմից ներդրումային ծրագրերի աջակցմանն ուղղված խորհրդատվական ելույթում հնչեցին յուրաքանչյուր ծրագրին մեթոդական և բովանդակային օգնություն ցուցաբերելու մարզպետարանի պատրաստակամության մասին:

**5. Կարևորվեց՝** ՀՀ Արագածոտնի մարզում կազմակերպվող «Իմ քայլը հանուն Արագածոտնի» խորագրով ներդրումային համաժողովի իրականացման վերաբերյալ: «Իմ քայլը հանուն Արագածոտնի» խորագրով բիզնես-ֆորումի նպատակն է Արագածոտնի մարզի ներդրումային պոտենցիալի ներկայացումը, ինչպես նաև մարզում տնտեսական ակտիվության խթանումը և դրան ուղղված տեղական և օտարերկրյա ներդրումների ներգրավումը: Առաջարկվեց ՀՀ Արագածոտնի մարզպետարանի աշխատակազմի զարգացման ծրագրերի, զբոսաշրջության և վերլուծության բաժին ներկայացնել տեղեկատվություն ծագումով մարզի համայնքներից արտերկրում և Հայաստանում ապրող գործարարների վերաբերյալ: Ֆորումին մասնակցելու հնարավորություն կունենան շահագրգիռ կառույցների ներկայացուցիչներ, գործարարներ և ներդրումներ իրականացնել ցանկացող անձինք: Ֆորումին կմասնակցեն ՀՀ վարչապետի պաշտոնակատար Նիկոլ Փաշինյանը, ՀՀ տարածքային կառավարման և զարգացման նախարարի պաշտոնակատար Սուրեն Պապիկյանը և այլ պաշտոնատար անձինք: Նախատեսվում է շեշտադրում կատարել մշակող արդյունաբերության, ՏՏ, ինչպես նաև զբոսաշրջության և գյուղատնտեսության ոլորտների վրա:

6. Մարզի համայնքներին սերմացուների, պարարտանյութերի և դիզվառելիքի տրամադրման, ինչպես նաև համայնքներում անասնաբուժի հաստիքների համալրման գործընթացը ավարտելու մասին հայտարարությամբ հանդես եկավ գյուղատնտեսության և բնապահպանության վարչության պետ Յու. Ազատյանը: Նա կարևորեց նաև բերքահավաքի վերաբերյալ ճշտված տեղեկատվություն ներկայացնելու խնդիրը: Շատ դեպքերում համայնքների ղեկավարները չեն տիրապետում և սխալ տեղեկատվություն են ներկայացնում: Անդրադարձ եղավ նաեւ նոր ինտենսիվ այգիների հիմնման, հակակարկտային ցանցերի, ոռոգման կաթիլային եղանակի ներդրման ծրագրերին:

7. Հայտարարությամբ հանդես եկավ մարզպետի տեղակալ Անահիտ Սարգսյանը, որը համայնքների ղեկավարներին տեղյակ պահեց, որ իր նախաձեռնությամբ և մարզպետարանի սոցիալական բաժնի աջակցությամբ Աշտարակի տարածաշրջանում սկսել են մի գործընթաց, որն ապահովելու է կյանքի դժվարին իրավիճակում հայտնված մարդկանց անձնագրերի ձեռք բերման աշխատանքները: Ինդրեց, որ համայնքների ղեկավարները իրենց աջակցությունը ցուցաբերեն համայնք այցելող աշխատակիցներին: Ծրագրի հաջող արդյունքի դեպքում նախատեսվում է այն իրականացնել նաև այլ տարածաշրջաններում:


8. Մարզպետարանի ԿԲՍ վարչության պետի պաշտոնակատար Կ. Սիմոնյանն էլ կարևորեց դպրոց-համայնք կապի արդյունավետությունը, հատկապես 78 դպրոցներում,

որտեղ գործում է „Տաք սնունդ“, ծրագիրը: Այդ համայնքներում խիստ կարևոր է համայնքների ղեկավարների աջակցությունը: Համայնքներում կրթության առաջընթացի պարագայում կունենանք հզոր հայրենիք:

9. ՀՀ ՊՆ Արագածոտնի մարզի գինվորական կոմիսար, գնդապետ Մ. Ղազարյանն էլ իր հայտարարության մեջ նշեց, որ նոյեմբերի 1-ից սկսվում է զորակոչի նախապատրաստման երկրորդ փուլը և ցանկալի է, որ համայնքի ղեկավարները այս հարցում աջակցեն իրենց, ծանուցումները ժամանակին զորակոչիկներին հասցնելու և համայնքի զորակոչային տարիքի երիտասարդների մեջ զորակոչից խուսափելու դեպքերը բացառելու նպատակով:

Մարզխորհրդի նիստին հնչեցին նաև այլ հարցեր, որոնց տրվեցին պատասխաններ և պարզաբանումներ:

Մարզպետ՝



ԴԱՎԻԹ

ԳԵՎՈՐԳՅԱՆ